



**O‘ZBEKISTON RESPUBLIKASI SOG‘LIQNI SAQLASH VAZIRINING
B U Y R U G‘ I**

20 22 yil “ 7 ” 01

№ 03

Toshkent sh.

**“Республика ихтисослаштирилган гематология
илмий-амалий тиббиёт маркази” давлат муассасаси фаолиятини ташкил
этиш чоралари тўғрисида**

Ўзбекистон Республикаси Президентининг “Аҳолига гематология ва онкология хизматларини кўрсатиш тизимини янада такомиллаштириш тўғрисида” 2021 йил 27 майдаги ПҚ-5130-сон ва Вазирлар Маҳкамасининг “Гематологик ва онкологик касалликларга чалинган беморларни янада қўллаб-қувватлаш чора-тадбирлари тўғрисида” 2021 йил 13 октябрдаги 643-сон қарорлари ижросини таъминлаш мақсадида **буюраман:**

1. Қуйидагилар:

Республика ихтисослаштирилган гематология илмий-амалий тиббиёт марказининг ташкилий тузилмаси 1-иловага;

Республика ихтисослаштирилган гематология илмий-амалий тиббиёт марказининг низоми 2-иловага мувофиқ тасдиқлансин.

2. Мазкур буйруқ қабул қилиниши муносабати билан Соғлиқни сақлаш вазирининг 2020 йил 9 мартдаги “Республика ихтисослаштирилган гематология илмий-амалий тиббиёт маркази” давлат муассасаси фаолиятини ташкил этиш чоралари тўғрисида”ги 61-сонли буйруғининг 1 ва 2-иловалар ўз кучини йўқотган деб топилсин.

3. Республика ихтисослаштирилган гематология илмий-амалий тиббиёт маркази директори (М.Исламов) марказнинг белгиланган тартибда рўйхатдан ўтказилиши ва тўлақонли фаолият олиб боришини таъминлансин.


4. Мазкур буйруқ ижросини назорат қилиш вазир ўринбосари У.Сабиоров зиммасига юклатилсин.

Вазир



Б.Мусаев

Республика ихтисослаштирилган гематология илмий-амалий тиббиёт маркази
ТУЗИЛМАСИ



РЕСПУБЛИКА ИХТИСОСЛАШТИРИЛГАН ГЕМАТОЛОГИЯ ИЛМИЙ АМАЛИЙ ТИББИЁТ МАРКАЗИ НИЗОМИ

1. Умумий қоидалар

1. Ушбу низоми “Республика ихтисослаштирилган гематология илмий-амалий тиббиёт маркази” (кейинги ўринларда “Марказ” деб аталади) фаолиятини ташкил этиш ва молиялаштириш тартибини белгилайди.

2. Марказ Ўзбекистон Республикаси Президентининг 2020 йил 10 февралдаги ПҚ 4592-сон “Ўзбекистон Республикасида гематология ва трансфузиология хизматларини ривожлантириш ҳамда онкогематологик ва даволаш қийин бўлган касалликларга чалинган шахсларни янада қўллаб-қувватлаш чора-тадбирлари тўғрисида” ва 2021 йил 27 майдаги ПҚ 5130-сон “Аҳолига гематология ва онкология хизматларини кўрсатиш тизимини янада такомиллаштириш тўғрисида” қарорлари асосида республика даволаш-профилактика муассасаси негизида ўз фаолияти йўналиши бўйича даволаш-профилактика ва илмий-услубий йўналишида фаолият олиб боровчи ҳамда аҳолига юқори малакали ихтисослаштирилган тиббий ёрдам кўрсатувчи мустақил давлат тиббиёт ташкилоти сифатида ташкил этилади.

3. Марказ Соғлиқни сақлаш вазирлиги Гематология ва қон қуйиш илмий-текшириш институти ҳуқуқий вориси ҳисобланади.

4. Марказ давлат муассасаси шаклида ташкил этилади, юридик шахс ҳисобланади, ўз мустақил балансига эга, белгиланган тартибда Ўзбекистон Республикаси ҳудудидаги банкларда ҳисоб-китоб рақамлари ва валюта ҳисоб рақамларини, шахсий ғазна ҳисоб рақамларини очади, Марказнинг тўлиқ номи ёзилган герб тасвирли думалок муҳрга, штампларга ва бланкаларга эга.

5. Марказ ўз фаолиятида Ўзбекистон Республикаси Конституцияси ва қонунларига, Ўзбекистон Республикаси Олий Мажлиси палаталари қарорларига, Ўзбекистон Республикаси Президенти фармонлари, қарорлари ва фармойишларига, Ўзбекистон Республикаси Вазирлар Маҳкамаси қарорлари ва фармойишларига, Ўзбекистон Республикаси Соғлиқни сақлаш вазирлиги буйруқларига, бошқа меъёрий-ҳуқуқий ҳужжатларга ва ушбу низомига амал қилади.

6. Марказнинг тўлиқ номи:
давлат тилида – “Республика ихтисослаштирилган гематология илмий-амалий тиббиёт маркази”;

а) рус тилида – “Республиканский специализированный научно-практический медицинский центр гематологии”;

б) инглиз тилида – “The Republican Specialized Scientific-Practical Medical Center of Hematology”;

7. Марказ Ўзбекистон Республикаси Соғлиқни сақлаш вазирлигига бўйсунди.

8. Марказ манзили: Ўзбекистон Республикаси, Тошкент шаҳри, Чиланзор тумани, Арнасой кўчаси 17-уй.

2. Марказнинг асосий мақсад, вазифа ва функциялари

9. Қуйидагилар Марказни ташкил этиш ва унинг фаолияти мақсадлари ҳисобланади:

а) юқори малакали ва юқори сифатли ҳамда ҳозирги замон халқаро талабларига мос келадиган гематологик ихтисослаштирилган тиббий ёрдам кўрсатишга мўлжалланган юқори технологик моддий ва илмий базани, шунингдек, ушбу йўналишдаги мактабни шакллантириш;

б) гематология ихтисослиги бўйича касалликларга ташхис қўйиш, уларни даволаш ва касалликларнинг олдини олишда аҳолининг юқори малакали ихтисослаштирилган тиббий ёрдамга бўлган талабини қондириш.

Қуйидагилар Марказнинг асосий вазифалари ҳисобланади:

а) аҳолига гематологик ихтисослиги бўйича юқори малакали ихтисослаштирилган тиббий ёрдам кўрсатиш:

Ўзбекистон Республикаси Президентининг ёки Ўзбекистон Республикаси Ҳукуматининг қарорлари асосида аниқланадиган имтиёзли тоифага кирувчи шахсларга бепул;

Ўзбекистон Республикаси фуқароларига (бундан ушбу кичик банднинг иккинчи хатбошида кўрсатилган шахслар мустасно) имтиёзли ва чет эллик фуқароларга ва фуқаролиги бўлмаган шахсларга пуллик;

б) мавжуд тиббиёт техникаларининг доимий равишда янгиланиб борилишини ва замонавийлаштиришни таъминлаш, Марказни ўз ихтисослиги бўйича ҳозирги замон халқаро талабларига мос келадиган юқори малакали ихтисослаштирилган тиббий ёрдам кўрсатиш имконини берадиган замонавий тиббиёт асбоб-ускуналари билан жиҳозлаш;

в) Марказ фаолиятини таъминлаш учун молиявий ва моддий техник ресурсларни жалб қилиш бўйича менежмент ҳамда маркетинг ишларини ташкил этиш;

г) Марказ тиббиёт ходимларининг касбий даражасини, шу жумладан мутахассисларнинг хорижий етакчи тиббиёт (таълими) муассасаларида ва клиникаларида ўз ихтисослиги бўйича касалликларга ташхис қўйиш ва уларни даволашнинг замонавий усуллари бўйича малака оширишларини ташкил этиш ҳисобига доимий тарзда ошириб бориш ва такомиллаштириш;

д) гематология бўйича касалликларнинг олдини олиш, уларга ташхис қўйиш, касалликларни даволаш бўйича ўз илғор усуллари ва технологияларини ишлаб чиқишга ҳамда тиббий амалиётга жорий этишга қаратилган илмий тадқиқотлар олиб бориш;

е) гематология бўйича халқаро ташкилотлар, хорижий етакчи тиббиёт муассасалари билан халқаро ҳамкорликни кенгайтириш ва мустаҳкамлаш, тўпланган тажриба, ахборотлар, шунингдек, мутахассислар алмашинувини таъминлаш;

ж) гематология бўйича касалликларга ташхис қўйиш ва уларни даволашнинг патентланган ўз усуллари ва технологияларини доимий равишда

такомиллаштириб бориш ҳамда уларнинг халқаро миқёсда эътироф этилишига эришиш;

з) гематология бўйича республика мақсадли дастурларини ишлаб чиқишда ва амалга оширишда фаол иштирок этиш;

и) ҳудудий бўлинмаларига ташкилий-услубий раҳбарлик қилиш, уларнинг амалиётига тиббий ёрдамнинг замонавий усуллари ва технологияларини жорий этиш, минтақаларда зарур профилактик ишлар ўтказишда кўмаклашиш, сайёр маслахатлар, маҳорат дарсларини мунтазам равишда ўтказиб бориш;

к) биргаликда илмий-тадқиқот ва таълим лойиҳаларини бажариш, шифокор кадрларни тайёрлаш ва қайта тайёрлаш, биргаликда илмий тадқиқотларни амалга ошириш учун чет эллик профессорларни илмий фаолиятга, шунингдек, халқаро грантларни жалб қилиш;

л) жорий гематологик вазиятга эътибор қаратиш бўйича ўз вақтида муносиб чоралар кўриш учун таклифлар ишлаб чиқиш мақсадида шерик ташкилотлар, шу жумладан хорижий йирик ташкилотлар билан ҳамкорликда гематологик касалликлар тарқалишини, ташхиси ва давосида юкоритехнологик усулларни баҳолашга қаратилган даврий тадқиқотлар ўтказиш.

м) Ўткир ва сурункали лейкозда, гематологик касалликларга чалинган беморларда ўзак кўмиги хужайраларини кўчириб ўтказишни яъни трансплантология фаолиятини йўлга қўйиш, қон ва ўзак хужайралари банки, янги шаклдаги микробиология ва вирусология лабораториялари, юқори технологик; молекуляр генетика, цитогенетика ва FISH лабораторияси, иммунофенотиплаш FLO лабораторияси, HLA-генотиплаш лабораторияси, гистология ва иммуногистокимё каби лабораториялардан фойдаланган ҳолда кўрсатилаётган тиббий ёрдам сифатини ва даво самарадорлигини ортишига, асоратлар камайишига эришиш.

10. Марказ ўзига юклатилган вазифаларни бажариш учун қуйидаги функцияларни бажаради:

ўз ихтисослиги бўйича ҳозирги замон халқаро талаблари даражасида касалликларга ташхис қўйиш, уларни даволаш ва олдини олишнинг энг самарали усуллар билан республика аҳолисининг эҳтиёжини қондиради;

Марказнинг республика минтақаларида ўз ихтисослиги бўйича маслаҳат-ташхис тиббий ёрдамини кўрсатувчи бошқа шу йўналишдаги муассасаларга (бўлинмаларга) ташкилий-услубий ва илмий амалий ёрдам кўрсатади;

Марказ ҳудудий бўлинмаларидан статистик ҳисоботларни бош гематолог билан қабул қилиб, гематология ҳолатини мониторинг қилади;

минтақаларга борган ҳолда юқори малакали ихтисослаштирилган тиббий ёрдам кўрсатади;

ўз ихтисослиги бўйича ўзининг юқори малакали мутахассислар мактабини шакллантиради ва ривожлантиради;

Марказ гематология ихтисослиги бўйича тиббиёт соҳасидаги илмий тадқиқотларини ривожлантиришнинг устувор йўналишлари бўйича таклифларни кўриб чиқиш учун Ўзбекистон Республикаси Соғлиқни сақлаш вазирлигига киритади;

дори воситаларини, тиббиёт буюмларини, шунингдек, ўз ихтисослиги бўйича ташхис қўйиш ва даволаш усулларини клиник синовдан ўтказди;

хориждаги тиббиёт ҳамжамиятига ўзининг илмий ва технологик ютуқларини тақдим этади;

ўз ихтисослиги бўйича ўзининг илмий, ўқув-услубий ва ахборот-маълумотнома материалларини чоп этади;

тиббиёт кадрларини клиник ординатурада, базавий докторантурада, докторнатурада, катта илмий ходим-изланувчилар институтида тайёрлайди, қайта тайёрлайди ва уларнинг малакасини оширади;

Марказнинг тиббиёт кадрларини тайёрлаш, қайта тайёрлаш ва уларнинг малакасини ошириш, чет мамлакатларнинг шу йўналишдаги тиббиёт муассасалари иштирокида қўшма илмий-амалий тадқиқотлар ўтказиш учун юқори малакали чет эллик мутахассисларни илмий фаолиятга жалб қилади;

амалий кўникмаларни мустаҳкамлаган ҳолда назарий билимларни ўзлаштириш асосида тиббиёт таълим муассасаларида шу йўналишдаги мутахассисликлар бўйича таълим сифатини оширишга фаол кўмаклашади.

3. Марказнинг ҳуқуқ ва мажбуриятлари

11. Марказ ўзига юклатилган вазифа ва функцияларни бажариш учун қуйидаги ҳуқуқларга эга:

қонун ҳужжатларида белгиланган доирада ўзига берилган давлат мулкидан фойдаланиш ва уни тасарруф этиш;

ривожлантиришга доир бизнес режаларни, харажатлар сметаларини мустақил шакллантириш, уларнинг хажмларини ва шакллантириш манбаларини, шунингдек харажатлар йўналишини белгилаш;

қонун ҳужжатларида белгиланган тартибда асосий воситаларни ижарага олиш ёки ижарага бериш, грантларни ва бошқа молиявий ёрдамни жалб қилиш;

қонун ҳужжатларида белгиланган тартибда тиббий ва бошқа хизматларни кўрсатишдан тушган даромадлар доирасида Марказ ходимларининг меҳнатга ҳақ тўлаш ва уларни моддий рағбатлантириш миқдорларини белгилаш;

мавжуд молиявий ресурслар ва ўз фаолиятдан топилган фойда доирасида асбоб-ускуналар, дори воситалари ва Марказ фаолиятини таъминлаш учун зарур бўлган бошқа моддий-техник воситалар харидини амалга ошириш;

гематология бўйича илмий тадқиқотлар ўтказиш мақсадида Ўзбекистон Республикаси Давлат бюджетидан грантлар олиш учун танловларда иштирок этиш;

ўз фаолиятини амалга ошириш жараёнида яратилган интеллектуал мулк объектларига доир муаллифлик ҳуқуқларини олиш ва улардан фойдаланиш;

чет эллик юридик шахслар билан илмий ва илмий-техник ҳамкорлик қилиш, шунингдек, Ўзбекистон Республикасининг қонун ҳужжатларига ва халқаро шартномаларига мувофиқ ташқи иқтисодий фаолиятни олиб бориш;

Марказ қонун ҳужжатларига мувофиқ бошқа ҳуқуқларга ҳам эга бўлиши мумкин.

12. Марказ Ўзбекистон Республикаси Молия вазирлиги ҳамда Монополияга қарши курашиш қўмитаси билан келишувга кўра Ўзбекистон Республикаси Соғлиқни сақлаш вазирлиги томонидан белгиланадиган тарифларни шакллантириш тартибига мувофиқ ташхис қўйиш ва даволаш сифати бўйича тасдиқланган стандартларга кўра кўрсатиладиган барча турдаги тиббий хизматлар нархларини мустақил равишда тасдиқлайди.

13. Марказ қуйидагиларга мажбур:

юқори малакали гематологик ихтисослаштирилган тиббий ёрдамга муҳтож бўлган беморларга ташхис қўйиш ва уларни даволаш сифати ҳамда стандартларнинг ҳозирги замон халқаро талаблари даражасида сақланишини ва ривожлантирилишини таъминлаш;

гематология бўйича қуйидагиларга юқори малакали ихтисослаштирилган тиббий ёрдам кўрсатиш:

рўйхати Ўзбекистон Республикаси Президентининг ёки Ўзбекистон Республикаси Ҳукуматининг қарорлари асосида аниқланадиган имтиёзли тоифага кирувчи шахсларга бепул;

Ўзбекистон Республикаси фуқароларига(бундан ушбу банднинг тўртинчи хат бошида кўрсатилган шахслар мустасно), шунингдек чет эллик фуқароларга ва фуқаролиги бўлмаган шахсларга пуллик;

Марказ гематология бўлимларига, шунингдек Қорақалпоғистон Республикасидаги, вилоятлардаги ва Тошкент шаҳридаги минтақавий бўлинмаларига маслаҳат, услубий ва техник ёрдам кўрсатиш;

гематология бўйича олдини олиш, ташхис қўйиш ва даволашнинг янги технологияларини яратиш бўйича илмий тадқиқотларнинг юксак даражада ўтказилишини таъминлаш;

Марказ тиббиёт ходимларининг касбий даражасини, шу жумладан мутахассисларнинг хорижий етакчи тиббиёт таълим муассасаларида ва клиникаларида касалликларга ўз ихтисослиги бўйича ташхис қўйиш ва уларни даволашнинг замонавий усуллари бўйича стажировкаларини ташкил этиш ҳисобига доимий равишда ошириб бориш ва такомиллаштириш;

Марказ ходимларига қонун ҳужжатларида назарда тутилган меҳнатни ташкил этиш шароитларини яратиш ва меҳнатга ҳақ тўлаш, хавфсизлик техникасини тақдим этиш, уларни ижтимоий жиҳатдан таъминлаш ва мақсадли ижтимоий ҳимоя қилиш;

Марказнинг моддий-техника базасини ўз маблағлари ва жалб этиладиган маблағлар ҳисобидан ривожлантириш ҳамда замонавий тиббиёт техникаси ва технологиялари билан мустаҳкамлаш;

мол-мулкдан аниқ мақсадда фойдаланиш, унинг бутлигини таъминлаш;

қонун ҳужжатларига мувофиқ бухгалтерия ва статистика ҳисобини ҳамда ҳисоботини юритиш;

Марказда қонун ҳужжатларига мувофиқ бошқа мажбуриятлар ҳам бўлиши мумкин.

4. Марказнинг мол-мулки

14. Асосий фондлар, шунингдек бошқа моддий бойликлар ва молиявий ресурслар Марказнинг мол-мулкини ташкил этади.

15. Марказ доимий фойдаланиш ҳуқуқлари асосида ер участкаларига эгалик қилади, қонун ҳужжатларида белгиланган тартибда ўз фаолиятининг мақсадларига, мулкдорларнинг топшириқларига ва мол-мулкнинг мақсадга мувофиқ ўзига бириктирилган мол-мулкка эгалик қилади, ундан фойдаланади ва уни тасарруф этади, бунда бюджет маблағлари ва бюджетдан ташқари маблағлардан самарали фойдаланишни таъминлайди.

16. Марказ қонун ҳужжатларида белгиланган тартибда вақтинча фойдаланмаётган биноларни шартнома асосида ижарага бериш, тушган маблағларни Марказни моддий-техник ривожлантириш учун ишлатиш, шунингдек, асбоб-ускуналарни ва мол-мулкни қонун ҳужжатларида назарда тутилган тартибда баланسدан чиқариш ҳуқуқига эга.

5. Марказ тузилмаси ва Марказни бошқариш

17. Марказ кенгаши Марказнинг юқори бошқарув органи ҳисобланади.

Марказ кенгаши 7 кишидан иборат бўлиб, Марказ директоридан, Марказнинг етакчи тиббиёт ва илмий ходимларидан ташкил топади. Марказ кенгаши фаолиятида Ўзбекистон Республикаси Соғлиқни сақлаш вазирлигининг ваколатли вакиллари иштирок этадилар.

Марказ кенгаши тўғрисидаги Низом ва унинг шахсий таркиби Марказ меҳнат жамоаси умумий йиғилишининг қарори билан тасдиқланади.

Марказ директори айна бир вақтда Марказ кенгаши раиси ҳисобланади.

18. Марказ кенгашининг асосий вазифалари қуйидагилардан иборат:

Марказнинг молиявий-ҳўжалик ва тиббий фаолиятини бошқариш, шунингдек, Марказ фаолиятининг самардорлигини оширишга қаратилган тавсияларни ишлаб чиқиш;

ривожланиш стратегиясини ишлаб чиқиш, Марказ инвестиция ва илмий-техник сиёсатнинг асосий йўналишларини белгилаш;

йиллик бизнес-режаларни ва молиявий ҳисоботларни тасдиқлаш;

аҳолига пулли асосда кўрсатиладиган тиббий ёрдам турлари нархларини белгиланган тартибда тасдиқлаш;

Марказдаги, шунингдек, унинг ҳудудий бўлинмаларидаги муносабатларни тартибга солувчи норматив ҳужжатларни тасдиқлаш.

19. Марказ тузилмаси қонун ҳужжатларида белгиланган тартибда Ўзбекистон Республикаси Соғлиқни сақлаш вазирлиги томонидан тасдиқланади.

20. Марказнинг жорий фаолиятига раҳбарликни Ўзбекистон Республикаси Соғлиқни сақлаш вазири томонидан Ўзбекистон Республикаси Вазирлар Маҳкамаси билан келишилган ҳолда тайинладиган ва лавозимидан озод этиладиган директор амалга оширади.

21. Марказ директори:

Марказ номидан ўз фаолиятини олиб боради, Марказнинг молия-хўжалик фаолиятига раҳбарлик қилади, Марказ номидан шартномалар тузади, Марказ фаолияти билан боғлиқ бўлган бошқа масалаларни ҳал қилади;

Марказ ва унинг ҳудудий бўлинмалари ходимлари ишларини ўз ваколатлари доирасида ташкил этади ва бошқаради, Марказ ва унинг ҳудудий бўлинмалари ходимлари томонидан бажарилиши шарт бўлган буйруқлар чиқаради, Марказ ходимларини қонун ҳужжатларига мувофиқ ишга қабул қилади ва ишдан бўшатади;

Марказнинг директори ўз ҳуқуқларини амалга оширишда ва вазифаларини бажаришда Марказ манфаатларини кўзлаб ҳаракат қилиши керак ҳамда Ўзбекистон Республикаси Давлат бюджетига ва давлат мақсадли жамғармаларига тўловларнинг, иш ҳақининг ўз вақтида тўланиши, меҳнат ҳуқуқлари ва муносабатларидан ҳамда уларга тенглаштирилган тўловлардан келиб чиқадиган барча талабларнинг қондирилиши, тиббий хизматни кўрсатиш фаолияти билан бевосита боғлиқ бўлган эҳтиёжлар учун пул маблағларининг ўтказилмаганлиги, ўзининг ҳаракати (ҳаракатсизлиги) туфайли, шу жумладан, Марказ мулки йўқолган тақдирда Марказга етказилган зарарлар учун қонун ҳужжатларида белгиланган тартибда жавоб беради;

Марказ фаолияти билан боғлиқ бўлган бошқа масалаларни ҳал қилади ва Марказ фаолияти учун жавоб беради.

22. Марказ директори ўринбосарлари Ўзбекистон Республикаси Соғлиқни сақлаш вазирлиги томонидан Марказ директорининг тақдимномасига биноан лавозимга тайинланади ва лавозимидан озод этилади.

23. Марказда унинг етук илмий ходимларидан ва мутахассислардан иборат Илмий кенгаш ташкил этилади.

24. Марказнинг Илмий кенгаши тўғрисидаги Низом ва унинг шахсий таркиби Марказ директори томонидан тасдиқланади.

25. Ўзбекистон Республикаси Соғлиқни сақлаш вазирлиги Марказнинг аҳолига юқори малакали ихтисослаштирилган тиббий ёрдам кўрсатиш бўйича фаолиятини назорат қилади.

6. Марказ фаолиятини молиялаштириш

26. Марказ фаолияти:

Ўзбекистон Республикасининг Давлат бюджети маблағлари; Марказнинг ўз даромадлари; грантлар ва хайрия ёрдами; қонун ҳужжатларида тақиқланмаган бошқа манбаалар ҳисобидан молиялаштирилади.

27. Марказнинг ўз даромадлари қуйидагилар ҳисобига шакллантирилади:

Марказнинг илмий ва ўқув базасида бошқа тиббиёт муассасаларининг шу йўналишдаги мутахассисларини тайёрлаш; илмий-тадқиқот ишларини олиб бориш; қонун ҳужжатларида тақиқланмаган бошқа манбаалар.

28. Ўзбекистон Республикаси давлат бюджети маблағлари қуйидаги мақсадларга ажратилади:

поликлиниканинг мавжуд бемор ўринлари фонди ва контингентларни қабул қилиш қувватининг фоиз нисбатида имтиёзли тоифага кирувчи

беморларга бепул асосида, шу жумладан шошилиш тартибда юқори малакали ихтисослаштирилган тиббий ёрдам кўрсатиш бўйича Марказ томонидан кўрсатиладиган хизматларга ҳақ тўлаш;

аҳолига имтиёзли тарифлар бўйича айрим турдаги юқори технологик (қиммат турадиган) тиббий хизмат кўрсатиш билан боғлиқ хизматларга ҳақ тўлаш. Уларнинг рўйхати ва тўланадиган ҳақ фоизи Соғлиқни сақлаш вазирлиги томонидан Ўзбекистон Республикаси Молия вазирлиги билан келишилган ҳолда аниқланади. Аҳолига имтиёзли тарифлар бўйича кўрсатиладиган айрим турдаги технологик (қиммат турадиган) тиббий хизматлар рўйхати ва тўланадиган ҳақ фоизи заруратга қараб, бироқ уч йилда камида бир марта қайта кўриб чиқилади;

Марказни соғлиқни сақлашни ривожлантиришга доир давлат дастурлари ва Ўзбекистон Республикасининг ҳар йиллик инвестиция дастурлари доирасида замонавий тиббиёт асбоб-ускуналари ва техникалари билан жиҳозлаш;

марказни янги бўлимларини яратиш;

илмий-тадқиқот фаолияти учун грантлар шаклида.

29. Марказга аҳолига юқори малакали ихтисослаштирилган тиббий хизматлар кўрсатиш билан боғлиқ хизматларга ҳақ тўлаш учун ажратиладиган Ўзбекистон Республикаси Давлат бюджети маблағларининг аниқ миқдори Ўзбекистон Республикаси Соғлиқни сақлаш вазирлиги ва Марказ томонидан “Соғлиқни сақлаш” соҳасига ҳар йили бюджетдан ажратиладиган маблағлар доирасида тегишли юқори малакали ихтисослаштирилган тиббий ёрдам олишга бўлган эҳтиёжга қараб аниқланади.

30. Марказга бюджет маблағлари Ўзбекистон Республикаси Соғлиқни сақлаш вазирлиги томонидан штатлар жадвали ва харажатлар сметаси асосида алоҳида харажатлар моддаси бўйича ойма-ой тақсимланган ҳолда ажратилади.

31. Марказ тиббий хизматлар кўрсатишдан ва бошқа хизматлардан тушган даромадлар доирасида мустақил равишда:

Марказ даромадлари ва харажатлари сметасини ишлаб чиқади ҳамда тасдиқлайди;

Марказ ходимларининг меҳнатига ҳақ тўлаш ва уларни моддий рағбатлантириш тўғрисидаги Низомни ишлаб чиқади ва тасдиқлайди;

қонун ҳужжатларида белгиланган тартибда бошқа табдирларни белгилайди.

32. Марказ хўжалик фаолиятидан тушган даромадларни мустақил равишда тасарруф этади. Марказнинг ўз молиявий-хўжалик фаолияти натижасида олган фойдаси Ўзбекистон Республикаси Давлат бюджетига тегишли солиқлар ва бошқа мажбурий тўловлар тўлангандан кейин Марказ ихтиёрида қолади ҳамда белгиланган тартибда:

Марказнинг моддий-техник базасини янгилаш, модернизациялаш ва кегайтириш, замонавий тиббиёт техникасини, инвентарь ва асбоб-ускуналарни харид қилиш;

Марказ ходимларини моддий рағбатлантириш;

айланма маблағларни тўлдириш;

Марказ мутахассисларини тайёрлаш, қайта тайёрлаш ва уларнинг малакасини ошириш;

Марказ фаолиятини таъминлаш билан боғлиқ бошқа мақсадлар учун фойдаланилади.

Бунда Марказ ушбу бандда кўрсатилган харажатларнинг устуворлик тартибини, йўналишларини ва нисбатини ўзи белгилайди.

7. Ҳисобга олиш ва ҳисобот

33. Марказ қонун ҳужжатларида белгиланган тартибда бухгалтерия ҳисоби ва ҳисоботини юритади, уларни Ўзбекистон Республикаси Соғлиқни сақлаш вазирлигига ва Ўзбекистон Республикаси Давлат статистика қўмитасига тақдим этади, ҳужжатларнинг бутлиги ва келишилган рўйхатга мувофиқ давлатга сақлаш учун топшириш учун жавоб беради.

34. Марказнинг молия-хўжалик фаолиятини назорат қилиш ва текшириш молия органлари, давлат солиқ хизмати органлари, бошқа давлат органлари томонидан уларнинг ўз ваколатлари доирасида, шунингдек, қонун ҳужжатларида назарда тутилган тартибда аудитор ташкилотлари томонидан улар билан тузилган шартномалар асосида амалга оширилади.

8. Марказни қайта ташкил этиш ва тугатиш

35. Марказни қайта ташкил этиш ва тугатиш қонун ҳужжатларида белгиланган тартибда амалга оширилади.